

TARIKH	14 / 11 / 2013	MUKASURAT	12
HARI	KHAMIS	RUANGAN	NASIONAL

Zakat WP meningkat 20 peratus

HIDAYAH HAIROM

KUALA LUMPUR - Kutipan zakat Wilayah Persekutuan terus meningkat apabila dalam tempoh Januari hingga Oktober tahun ini, sebanyak RM338.97 juta berjaya dikutip.

Ia sekali gus menunjukkan peningkatan sebanyak 20 peratus berbanding kutipan dalam tempoh sama tahun lalu iaitu RM282.28 juta.

Pengerusi Pusat Pungutan Zakat Wilayah Persekutuan (PPZ-MAIWP), Datuk Che Mat Che Ali berkata, perkembangan itu turut selari dengan peningkatan jumlah pembayar apabila dalam tempoh sama seramai 114,066 pembayar direkodkan.

Menurutnya, ia meningkat sebanyak 14 peratus berbanding tempoh sama tahun lalu iaitu seramai 100,407 pembayar zakat.

"Perkembangan itu menunjukkan tahap kesedaran masyarakat yang semakin meningkat serta keadaan ekonomi yang stabil. Kemudahan saluran yang disediakan bagi tujuan pembayaran zakat juga menjadi antara faktor peningkatan ini.

"Kami di PPZ-MAIWP sentiasa mengambil inisiatif untuk meningkatkan lagi kutipan zakat dan saya optimis dalam tempoh menjelang hujung tahun ini ia mampu mencapai peningkatan sehingga 28 peratus berbanding tahun lalu," katanya pada Majlis Zakat Koperasi 2013, di Menara Yayasan Tun Razak, Jalan Bukit Bintang, semalam.

Hadir sama, Timbalan Ketua Pegawai Eksekutif PPZ-MAIWP, Abdul Hakim Amir Osman, dan Setiausaha MAIWP/Pengarah Jabatan Agama Islam Wilayah Persekutuan (JAWI), Paimuzi Yahya.

Pada majlis itu, sebanyak 13 koperasi menunaikan zakat perniagaan mereka dengan jumlah keseluruhan sebanyak RM1.86 juta.

Koperasi tersebut membabitkan Angkatan Tentera Malaysia Berhad, Tenaga Nasional Berhad, Jabatan Ukur & Pemetaan Malaysia Berhad, Kakitangan Petronas Berhad, Permodalan Felda Berhad, Dewan Bahasa dan Pustaka Berhad, Bank Persatuan Malaysia Berhad, Staf CIDB Berhad, Kakitangan Bank Rakyat Berhad, Kospeta Malaysia Berhad,

Jabatan Kastam Malaysia Berhad, Perkhidmatan Pelajaran Nasional Berhad dan Pekerja-pekerja Jabatan Perdana Menteri (M) Berhad.

Dalam pada itu, Abdul Hakim berkata, berdasarkan rekod PPZ-MAIWP, jumlah kutipan zakat menerusi koperasi bagi tempoh Januari hingga Oktober tahun ini menunjukkan hanya 38 buah koperasi membuat pembayaran zakat dengan jumlah keseluruhan RM1.56 juta.

Katanya, jumlah itu menunjukkan penurunan sebanyak 73 peratus berbanding tahun lalu sebanyak 59 koperasi membuat pembayaran zakat berjumlah RM5.84 juta dalam tempoh yang sama.

"Saya difahamkan antara faktor penurunan ini adalah apabila terdapat beberapa buah koperasi yang tidak dapat menunaikan zakat koperasi perniagaan mereka dalam tempoh sama seperti tahun-tahun lalu.

"Kami yakin dan percaya dengan kerja keras dan keizinan dari ALLAH SWT, kutipan zakat perniagaan koperasi akan meningkat menjelang hujung tahun ini," katanya.



Kesemua 13 wakil koperasi yang membuat pembayaran zakat perniagaan bergambar bersama Che Mat (tengah) dan renlika cek berjumlah RM1.86 juta pada majlis, semalam.